

# شهادة أحد الأطباء في مستشفى الدمرداش الجامعي " الجو ريحته دم "



السبت 27 يوليو 2013 12:07 م

## نافذة مصر

طبيب خليني أقول اللي حصل عشان أنا مش ضامن أنا هصحي إمتي :

المكان : استقبال الجراحه مستشفى الدمرداش

الزمان : اليوم 27-7 من الساعة 7:48 دقيقه حتي الساعه الواحده ظهرا !!

من أول ما رجلي دخلت الإستقبال و الإستقبال كان حاله مقلوب ... في كل دقيقه عربيه إسعاف أو اتنين كان بيوصلوا المستشفى و كل عربيه فيها اتنين أو ثلاثه مصابين , فضينا قسم التجميل عشان نقدر نستوعب الأعداد و بقي قسم التجميل بيستقبل الإصابات الخفيفه أو مش العميئه و قسم الجراحه بيستقبل الإصابات الحرجه و العيادات قفلت و كل طاقه المستشفى بقت موجهه للإستقبال فقط كل المصابين كانوا من المتظاهرين ... مفيش و لا مصاب كان من شرطه أو حيش " يبقي ازاي وزير الداخليه بيقول ان المتظاهرين هم اللي ضربوا رصاص "

حوالي الساعه 8:30 مستشفى التأمين الصحي أعلنت عدم قدرتها علي إستقبال حالات أخري و إن كل الحالات هتتحول لمستشفى الدمرداش و دار الشفا و " سيد جلال "

بلادني مبالغه معظم الإصابات اللي شفتها بعيني كانت إصابات رصاص حي في الراس أو الرقبه أو القلب ... من كل 20 حاله كانت بتبقي حاله مثلا ضرب برصاص حي في الأطراف أو خرطوش !!

أنا شفت بعيني 6 حالات وفاه :)) منهم اتنين رصاص حي في الدماغ مكنش فيه أي محاوله لإنقاذهم و اتنين رصاص حي في الرقبه حاولنا مع كل حاله 45 دقيقه CPR و لكن للأسف ماتوا معنا و حالتين رصاص في القلب مباشره .. حاله منهم الرصاصه كانت موجوده في ال ventricle و دول للأسف فشلت كل المحاولات في إنقاذهم :)))

في حاله من ال 6 اللي ماتوا مكنش معاه لا محفظه و لا موبايل و لا معاه حد و مات قبل ما نعرف حتي إسمه :))

اتملنا بزمايلنا في مستشفى رابعه الميداني و عرفنا ايه اللي ناقص ليهم و بعيناه مع دكتور و في بنت تطوعت إنها تشتري مستلزمات و توديهم بنفسها !!

علي الساعه 10 أو 11 عدد عربيات الإسعاف ابتيدي يقل و كلمنا المستشفى الميداني في رابعه و قالوا ان الضرب وقف !! اتصلت بزميل ليانا " مصطفى جمال " و كان جاي في عربيه إسعاف مع جئه متوفي من رابعه و مدرعات الجيش كانت قاطعه كل الطرق و فضل وقت طويل عقبال ما عرف يوصل الدمرداش

رقم وزارة الصحه مسخره ... ازاي 20 واحد توفوا و في الدمرداش في 6 و في دار الشفا في 11 و الأرقام دي أنا متأكد منها .. يبقي اللي مات في رابعه 3 بس !! .. و مع الاتصال بزمايلنا في المستشفى الميداني في رابعه أكدوا ليانا أن عدد الوفيات عندهم تجاوز حاجز ال 120 " الكلام ده كان من 3 ساعات "

نقطه إيجابيه أول ما وجهنا نداء إننا في حاجه إلي دم في بنك الدم في ناس كثير جم اتبرعوا و أنا ماشي كان في طابور علي بنك الدم للتبرع !!

د[الكفراوي وصل المستشفى حوالي الساعه 11-11:30 و لحد ما مشينا كان موجود بيشوف الدنيا ماشيه أزاي و ايه اللي ناقص

اللي حصل مجزره بكل المقاييس أسوأ 100 مره من أحداث محمد محمود و العباسيه ... الجو ريحته كانت دم !!

دي شهادتي عن اليوم في مستشفى الدمرداش الجامعي ... و حسبي الله و نعم الوكيل :)))